



Inatsisartuni ilaasortaq Tillie Martinussen, Suleqatigiissitsisut

Asasara Tillie Martinussen

15-08-2018
Suliaq normu: 2018-15819
Allakkiaq normu: 32341908

Inatsisartut suleriaasianni § 37 naapertorlugu apeqquteqaatinut nassiussannut qujanaq. Apeqqutit matuma kinguliani ataasiakkaarlugit allanneqarput, akissummillu malitseqarlutik.

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
Fax: (+299) 34 63 56
www.naalakkersuisut.gl

1. Qeqertarsuup Tunuanut Kujataanullu tunngatillugu kiffartuussinissamut isumaqatigiissutit qanoq sivisutigisumik atuuttussaappat, tassani Disko Linep kiffartuussinissamut isumaqatigiissutit ilaanik tigummivoq?

Kiffartuussinermut isumaqatigiissutit 31. decembari 2020-p tungaanut atuuttussaapput.

2. Naalakkersuisut naatsorsuutiginerlugu kiffartuussinissamut isumaqatigiissutit atuuttut taamatut isikkoqartillugit sivitsorneqarumaartut?

Kiffartuussinermut isumaqatigiissuteqarfiusup naanerani susoqassanersoq suli aalajangiisoqanngilaq. Inatsisartuni ilaasortat tamaasa oktobarip aallartinnerani Attaveqaqatigiinneq pillugu Isumasioqatigiinnissamut peqataaqqullugit qaaqqunikuuakka. Isumasioqatigiinnermi massakut isumaqatigiissutaasut naappata angallasseriaatsinut pilersaarusiornissaq ilaatigut oqallisigissavarput.

3. Kalaallit Nunaata kujataani ataqatigiissumik angallanneq qularnaarneqassappat ukiuni tulluuttuni aningaasanut inatsisitigut tamanna qanoq akeqassava aamma aningaasat suminngaanniit aaneqartariaqassappat?

- Tassa imaappoq, qularnaarlugu Air Greenlandip Disko Linellu suleqatigiinnissaat aamma qularnaarsinnaallugu aallanngitsoortoqartillugu angalasut ataqatigiissumik kiffartuunneqarsinnaanissaat?

Kalaallit Nunaata kujataani angallasseriaatsit assigiinngitsut marluk matumani pineqarmata, ataqatigiissumik sullissinissap qulakkeerneqarnissaa imaaliillaannaq pisinnaanngilaq. Kisiannili Naalakkersuisut isumaqatigiissutitut tapiliussat aqutugalugit taamaatitsisoqartillugu imaluunniit kinguaattoortoqartillugu, tamatumalu kingunerisaanik Kalaallit Nunaata kujataaniit angalasut ingerlaqqissinnaajunnaarnerini iliuusissanik qulakkeerikuupput. Kiffartuussinermut isumaqatigiissutit maanna atuuttut tunngavigalugit kiffartuussinermut isumaqatigiissuteqarfiusut aamma niuerneramik tunngaveqarluni angallassiviusut akornanni kinguaattoortoqartillugu inissinneqarnermut nerisaqarnermullu, aammalu Kalaallit Nunaanni apuuffissamut imaluunniit Danmarkimi Islandimiluunniit apuuffissamut siullermut bilitsinut taartissanut matussusiisoqartarpoq.

Ukioq manna juunimi allaffeqarfinniit, Air Greenlandimiit aamma Disko Linemit peqataaffigineqartumik suleqatigiissitamik pilersitsivunga. Suleqatigiissitap taassuma maanna angallasseriaasiusumi pitsannguutissanik siunnersuuteqarnissaq suliaasarivaa.

4. Air Greenlandip Disko Linellu Naalackersuisunut piffissap ingerlanerani oqaloqatigiissutigisimanerlugu billittip akianut ilanngullugu pinngitsoorani angalanerup sillimmasernissaanut akiliisoqartalernissaa?

Pinngitsoorani angalanerup sillimmasernissaanut akiliisoqartalernissaa eqqarsaatigissagaanni bilitsit akii, annaasinnaasat, pitsaassusaa, kiffartuussinerup nunallu karsianiit tapiissutit ataqatigiinnissaat isiginiarneqartariaqassaaq. Pinngitsoorani sillimmasiisarnermik atuutsitsisoqalissappat tamanna ilaasut, sullissisup imaluunniit nunap karsiata aningaasartuuteqarnerulernerinik nassataqassasoq naatsorsuutigineqartariaqarmat.

Kiffartuussinerup isumaqatigiissusiornermut atatillugu annaasaqarfiusinnaasut agguarneqarnissaannut najoqqutassat arlallit isumaliutigineqarnikuupput. Naalackersuisut tapiliussanik isumaqatigiissusiornerminni aalajangerput, maani najugaqavissunut kiffartuussinerup isumaqatigiissuteqarfiusut aamma niuernerup tunngaveqarluni angallassiviusut akornanni kinguaattoortoqartillugu bilitsinut taartissanut aamma inissinneqarnerup nerisaqarnermullu aningaasartuutit akilertarniarlugit.

5. Kujataani Avannaanilu Disko Linep kiffartuussinissamut isumaqatigiissuteqarfisaani kinguaattoortoqartillugu aallanngitsoortoqartilluguluunniit kiffartuussinerup isumaqatigiissutit allanngortillugit unnuisariaqartarnernut aningaasartuutit allallu aningaasartuutit pinngitsooratik qularnaarneqassappata pisortanut tamanna ukiumut qanormita naleqassava?

Apeqqu 3-p aamma 4-p ataanni taaneqartut, kiffartuussinerup isumaqatigiissutinut maani najugaqavissunut kiffartuussinerup isumaqatigiissuteqarfiusut aamma niuernerup tunngaveqarluni angallassiviusut akornanni kinguaattoortoqartillugu Kalaallit Nunaanni apuuffissamut imaluunniit Danmarkimi Islandimiluunniit ornitassamut siullermut bilitsinut taartissanut aamma inissinneqarnerup nerisaqarnermullu aningaasartuutit matussuserneqarnissaat ilaatinneqarpoq.

Sumiiffinni Disko Linep sullissivigisaani aaqjissuussinerup aningasartuutit imatut isikkoqarput:

2018-imi inissinneqarneq nerisaqarnerlu, 5.300.000 koruunit

2018-imi bilitsit taartissat, 4.500.000 koruunit

Bilitsinut taartissanut aningaasartuutissat missiliugaapput aammalu 2018-imi pisariaqartitaviit tunngavigalugit allanngorarsinnaallutik.

Isumaqatigiissusiornermi politikikkut kissaatigineqarpoq, aaqjissuussinerit ilaasunut maani najugaqavissunut atuutsinneqassasut, aningaasat innuttaasunut kalaallinut iluaqutaanissaat Naalackersuisunit kissaatigineqarmat. Assersuutigalugu takornariat, angalanerup sillimmasernissamik periarfissaqartut aaqjissuussinerup imaluunniit ilaatinneqanngillat.

6. Naalackersuisut naatsorsornikuunerlugu kiffartuussinermut isumaqatigiissutit allanngortillugit soorlu Blue Ice allallu angallassisartut namminersortut imartani sikusartuni akulikittumik angallassisartut ilanngunneqartuuppata tamanna qanoq akeqassanersoq, taamaaliornikkut qularnaarumallugu Kujataani Qaqortumiit Itilleq/Igalikumut taamatullu Narsarsuarmut angallassisalernissaq?

Kiffartuussinermut isumaqatigiissutit neqerooruteqartitsineq malillugu agguanneqarput. Ingerlatseqatigiiffiit kiffartuussinermut isumaqatigiissutini suliassanut neqerooruteqanngitsut isumaqatigiissuteqarfigineqarnerini akigititassaannik naatsorsuisoqarnikuunngilaq.

Angallavissatut siunnersuutigineqartoq Disko Linep ukioq manna piffissani ataasiakkaaginnarni atorpaa, angallavimmi nalinginnaasumi sikorsuit ajornartorsioritimmata. Kisiannili aamma angallavimmi tassani allanik unammillernartoqarsimavoq, Igalikumiit Itillimut nunakkut assartuussineq pisariaqartinneqartarmat.

7. Naalackersuisut pilersaaruteqarnerlutik kiffartuussinermut isumaqatigiissutit allanngortillugit annertusaanissaminnut? Taamaassimappat sooq? Taamaangippat soormita?

Apeqquut 2-p ataani taaneqartutut Inatsisartunut ilaasortat tamaasa oktobarip aallartinnerani Attaveqatigiinneq pillugu Isumasioqatigiinnissamut qaaquakka, tassanilu ilaatigut kiffartuussinermut isumaqatigiissutit pillugit apeqquutit oqallisigineqassapput.

8. Kiffartuussinermut isumaqatigiissutini utertitsisarnissaq Naalackersuisunit ilanngunneqarsimanerluni imaluunniit isumaqatigiissut alla angallassisartut akiliisartussanngorlugit kinguaattoorsimappata imaluunniit aallanngitsuuginarsimappata imaluunniit pilersaarutaareersut naapertorlugit angallassinertik ingerlassinnaangippassuk?

- Allatut oqaatigalugu kinguaattoortoqartillugu allanilluunniit pisoqartillugu kiap aningaasartuutit ersuttarpai?

Imaannerluni Landskarsi, aningaasanut inatsimmi sinaakkusiussat naapertorlugit aningaasartuutinik ersuttuusartoq, aningaasartuutinik akiliisartoq imaluunniit innuttaasut ataasiakkaat namminneq toqqaannartumik nammatassinneqartarpat imaluunniit ingerlatseqatigiiffik angallassisinnaasimangitsoq?

Sullissisut kiffartuussinissamut isumaqatigiissummi isumaqatigiissutigineqartutut naammattumik angallassisimangippata, sullissisumut tapiissutit ilanngarneqarsinnaapput. Aallarnerit kinguaattoorfiusimappata tapiissutinik ilanngaasoqartanngilaq.

Inissinneqarnermut nerisaqarnermullu aningaasartuutitut tunngatillugu sullissisoq taamatut sullissinissamut akimik aalajangersimasumik pissarsisarpoq. Tassalu ilaasut sapinngisamik ikinnerpaat inissinneqarnissaat nerisaqarnissaallu sullissisut soqutigisarisussaavaat. Bilitsinut taartissanut tunngatillugu isumaqatigiissummut ajunngitsorsiassat, bilitsinut taartissanut aningaasaliussat atorneqanngitsut tunngavigalugit naatsorsorneqartussat ilaatinneqarput. Taamaallunilu aamma bilitsinut taartissanut aningaasartuutit killilersorneqarnissaat sullissisup soqutigisarisussaavaa.

Inissinneqarnermut, nerisaqarnermut bilitsinullu taartissanut aningaasartuutit aningaasanut inatsimmut ilaatinneqarput.

9. Naalackersuisut pilersaaruteqarpat kiffartuussinermut isumaqatigiissutit eqqarsaatigalugit siunissami angallassisalersussanut kaammattuutigissallugu angallavinni assigiinngitsuni angallassisartut suleqatigiittalernissaannut taamaasillutillu Kalaallit Nunaata nunatsinni namminermi nunanilu allani takornariarfitsialattut tikiffissatullu tusaamasaanera isigineqarneralu qularnaarlugu?

Kalaallit Nunaanni angallassineq tamakkiisoq qulakkeerniarlugu maanna kiffartuussinermut isumaqatigiissutaasuni, kiffartuussinermut isumaqatigiissusiorfiusuni sullissisut sullissisunik allanik, Namminersorlutik Oqartussat kiffartuussinermut isumaqatigiissuteqarfigisaannik aammalu niuerneramik tunngaveqarluni angallavinni sullissisunik suleqateqarnissamut pisussaaffeqartut allassimareerpoq. Kisiannili niuerneramik tunngaveqarluni angallavinni sullissisut Namminersorlutik Oqartussanit suleqatigiinnissamut pisussaaffilerneqarsinnaanngillat.

Inussiarnersumik inuulluaqqusillunga

Simon Simonsen